

Nostalgia d'imperis pers

Naziunalissem da stadi en Frantscha ed Engalterra

DA GUIU SOBIELA-CAANITZ

■ **Ils 25 da matg han 24,85%, pia ina quarta part da votantas e votants en Frantscha, vuschà per la partida xenofoba, naziunalistica ed antieuropeica «Front National» (FN) tar las elecziuns al Parlament europeic; en Corsica, insla franzosa, ha il FN survegni «mo» 23,25% da las vuschs.** In resultat uschè extrem per ina partida analoga chat'ins en Gronda Britannia cun la «United Kingdom Independence Party» (Ukip): 27,49%, anc dapli per l'Engalterra sch'ins fa endament che l'Ukip ha survegni mo var 10,4% da las vuschs en Scozia. Londra e Paris, avant otganta onns, eran las chapitalas dals dus gronds imperis colonials europeics. A nord ed a sid dal Chanal da la Mongia para ina tscherta nostalgia da l'imperi pers, cun in ferm malesser en fatscha a l'immigraziun exotica, da declarer per part il success da talas gruppas politicas. Dus istorichers da l'Universitad da Constanza han gist scrit in cudesch da giaglioffa interessant ed instructiv davart l'emancipaziun da las colonias europeicas durant il tschientaner passà e sias consequenzas en Europa*. I resguardan cunzunt ils dus stadis en dumonda ed il Portugal, plinavant er il Giapun, e menziunan anc l'Italia, ils Pajais bass e la Belgia. I n'emblidan betg la Russia, ma manegian ch'ins «duaja chapir l'emancipaziun da las republicas sovieticas na russas [1991] sco part da la guerra freida globala» (p. 18); ils svilups dals davos mais en Ucraina pudesan metter en dumonda questa interpretaziun, damai che Moscau ha annectà illegalmain la Crim, part da lezza republica.

L'emancipaziun da las colonias

Ils auturs rapportan davart las etappas principalas da l'emancipaziun en l'imperi britannic: 1910 l'Africa dal sid, 1921 il stadi liber da l'Irlanda, 1932 l'Irac, 1946 la (Trans-)Jordania, 1947 l'India ed il Pachistan 1948 il Sri Lanca e la Burma, 1957 la Ghana e Malaisia euv. Il 1947 ha Londra surlaschà a l'ONU da reglar il problem da Palestina. Mo en ils onns 50, en Kenia e Malaisia, èn conflicts armads vegnids avant l'indipendenza. «Primminister Harold Macmillan era stà in imperialist persvas, ma l'onn 1960 è'l viagià sco ami dal naziunalissem african tras la vart sid dal continent» (p. 73). La cronologia da las emancipaziuns en l'Imperi britannic fiss anc blier pli lunga; tgi sa sch'ins na duaja baud agiunscher il num da la Scozia? La Frantscha perencunter ha basegnà blier temp per acceptar l'indipendenza da sias colonias: Siria e Libanon, lur il Vietnam, suenter la disfatga militar da Dien Bien Phu (1954), e cunzunt l'Africa. 1956 èn la Tunisia ed il Maroc vegnids independents, 1958 la Guineia, 1960 las bieras colonias franzosas da l'Africa euv. «En Algeria è sa sviluppada la crisa coloniala la pli greva. Tranter Numnasontga 1954 e l'armistizi dals 19 da mars 1962 ha furia la pli gronda guerra da liberaziun [dal tschientaner] cun ina schuldada da passa in milliun, dals quals 25 000 èn morts, e cun var 400 000



S'avischinar a la Russia da Putin, quai è ina da las finamiras principalas da Marine Le Pen e sia partida naziunalistica ed antieuropeica «Front National» areguard la politica estra.

KEYSTONE

Algerians mazzads (...). L'Algeria e l'Africa dal sid eran las pli grondas colonias d'immigraziun dal continent. Il 1954 vivevan en Algeria bunamain in milliun Europeans; i dominavan la vita politica locala ed eran represchentads en Frantscha d'ina gruppa turbulenta d'interess ch'impediva refurmas (...). Leschas per situaziuns d'urgenza han dotà l'armada da vasts plainpudairs (...). Ins è vegnì a torturar sistematicain ed ad internar e translocar blera glied (...). La pressiu internaziunala creschenta è stada decisiva per manar a tractativas d'armistizi davent da 1960 (...). Colonists radicalisads e cadens militars ch'eran sa fatgs independents cumbattevan mintga concessiu e mintga tractativa da pasch (...). L'Algeria è vegnida independenta da fanadur 1962» (pp. 70–72).

L'immigraziun vers l'Europa

«L'emancipaziun da las colonias ha muntà ina fasa impurtanta per ils stadis naziunals da l'Europa dal vest. Suenter decennis u (...) tschientaners d'orientaziun anora èn lur metropol vegnidas 'simpels' stadis naziunals. Ils centers bandunads èn vegnids pli europeics che mai, e quai betg mo areguard lur orientaziuns politicas ed economicas, mabain er en lur identitad. Cun las migraziuns èni vegnids a medem temp pli multifars che mai» (pp. 117–118). Suenter la Segunda guerra mundiala ha l'emancipaziun da las colonias gidà a sviluppar l'Europa dal vest ad in continent d'immigraziun. «La midada sociala la pli eiventa è stada la colliaziun (...) cun moviments da fugida immediat suenter la liberaziun (...). Ins calculescha che var 5–8 milliuns umans èn lur immigrads en l'Europa dal vest (...). L'onda principala d'emigraziun civila è ida en Frantscha, nua ch'ils Franzos d'Algeria, numnads silsuenter 'pied-noirs', furmavan la gruppa dominante (...). Suenter 1945 è creschida l'immigraziun da lavurers vers l'Europa dal vest

(...). Il problem central deriva da las racziuns rassisticas e xenofobas da defensiun davent da 1960 cunter l'immigraziun che provegniva d'auters continents» (pp. 120–122). Quai è in motiv central dal success dal FN en Frantscha: El recumonda da limitar drasticain l'immigraziun en Frantscha segund il model da l'iniziativa «cunter l'immigraziun massiva» acceptada ils 9 da favrer dal pievel svizzer e dals chantuns.

«Salvar la cultura cristiana»

Ma l'ideologia naziunalistica dal FN sa mussa anc pli clermain en sia admiraziun per il president russ Vladimir Vladimirovitch Putin. La «Frankfurter Allgemeine Zeitung» dals 23 da matg rapporta (p. 2): «Per intervistas televisivas sa fa filmar Marine Le Pen, presidenta dal FN, il pli gugent avant ina curuna da cudeschs nua ch'ella metta in volum russ sin l'autezza da la camera. Il titel munta: 'Marine Le Pen: La Russia ha basegn d'ella.' Vladimir Bolshacov l'ha deditgà lez cudesch; onns a la lunga era'l correspondent da la 'Pravda' a Paris (...). Ella vul cunzunt sa preschentar sco ina scheffa politica garegiada en Russia, (...) scumettond pli che mai sin il manader russ: 'Putin è in autentic patriot. Cun el pudain nus salvar la cultura cristiana', ha'la declarà dacurt. S'avischinar a la Russia da Putin, quai è ina da las finamiras principalas da Le Pen areguard la politica estra (...). Il primcandidat dal FN per l'Ile-de-France, la regiun da Paris, è il politolog Aymeric Chauprade: Lez ha già daditg creà ina rait en circuls russofils (...). El sa siemia d'ina axa eurasiatica Paris-Berlin-Moscau e crititgescha mudentmain l'Uniu europeica per sia strategia en la crisa ucranaisa (...). Ils 16 da mars è Chauprade i a la Crim, sin invit da Putin, sco 'observader da la votaziun'. El ha declarà immediat che lezza saja 'legitima' e ch'ins n'astgia betg ignorar las ragischs russas da la Crim (...).

Chauprade ed auters manaders dal FN doceschan a l'Institut da democrazia e svilup, (...) fundà il 2008; lez sa deditgescha a promover in 'maletg positiv' da la Russia e fa omagi a Putin ed a sia squadra da manaders. Donaziuns russas finanzieschan l'Institut, manà da Natalia Narohnizcaja, anteriura parlamentara da la partida russa 'Rodina' (...). Marine Le Pen recumonda a la Frantscha da sortir da l'UE e da l'Alleanza atlantica (...); ella ha declarà: 'Nus avain uschè blier da cuminanza. La Russia po esser loscha d'avair in autentic schef.'»

Demunis, visiuns, umans

Co va quai vinavant? «President François Hollande ha provà d'argumentar: 'Quai n'è betg mo in problem per la Frantscha, mabain per l'Europa.' El vul che l'Europa sa concentreschia dapli sin l'expansiun e damain sin l'austeritad» («The Economist», 31 da matg, p. 23). Geabain, ma quai na tanscha betg. Il publicist Torlach Mac Con Mí (Cuira) admonescha: «L'uman na viva betg mo da paun. Insaco turnan adina puspè ils demunis ch'al destrueschan, saja quai en il populissem da dretga, il neofaschissem (...) u ils cravals da ballape (...). L'uman basegna valurs ed ideals sco aspiraziuns. Ins na surmunta uschiglio mai il vegl naziunalissem e ses campanilissem, uschè profundamain enragischads. L'Europa pudess derasar valurs explicitas (...) per far valair ina pussanza paschaivla. Ma l'Europa che nus enconuschain na stat per nagut. Renunziand a la pussanza visiu coerenta renunzia ella a la pussanza paschaivla ch'ella pudess far valair» (<http://irischeheimat.wordpress.com>). Mariano Tschuor scriva en La Quotidiana dals 20 da matg (p. 14): «Temein nus l'Europa? Fagein nus gie part dad ella geograficamein e culturalmein (...). Cert, igl entusiassem per l'Europa e sias instituziuns politicas e giudizialas ei svanius. Il populissem politic en nossa tiara ha – suenter varga 30 onns campagna e propaganda – victorisau. Las partidas politicas dil miez han survegniu freid ils peis ed ein suandadas – sco nuorsas – l'ala dretga (...). Il museum dil Louvre dedichescha actualme in'expoziun speciala alla claustra da St. Maurice, mussond exponats sorprendents dils emprems tschentaners da quei monasteri vallesan e mettend quels en quei context europeic (...). 25% da la populaziun svizra ein oz migrantas e migrants.» Igl è evident che St. Maurice, sco blers lieus dal Grischun, è sa sviluppà tras ils tschientaners grazia al traffic tranter l'Italia e l'Europa dal nord. Era l'actualitad porscha bieras «visiuns coerentas» colliadas cun l'Europa. Co fissi per exempel cun ina politica europeica coerenta d'asil e d'immigraziun che pussibilitass da metter fin als dieschmillis morts annuals en il Mar mediterranean? In'utopia? «Die Würde des Menschen ist unantastbar.» N'èn quels morts betg er umans?

* Jan C. Jansen e Jürgen Osterhammel, **Dekolonisation. Das Ende der Imperien. Minca** (C. H. Beck, ISBN 978 3 406 65464 0) 2013.